

峽
石
山
水
志

蔣宏任
撰

中
華
書
局

峽石山水志

此據別下齋叢書
本排印初編各叢
書僅有此本

欽定四庫全書提要

峽石山水志一卷

國朝蔣宏任撰。宏任字擔斯，海寧人。海寧縣有峽石鎮，兩山竝峙，東曰審山，西曰紫微山，爲士人遊眺之所。宏任因爲之志，未有雍正戊申，自跋稱舊有志略，爲前輩沈伯翰所集，其家伏羌令丹厓所訂，則仍舊稟增修也。敘述頗爲雅潔，然兩山舊蹟載於咸淳臨安志者甚詳，皆略而不載。審山之名，沈山宋元時志書皆有辨證，亦未徵引。而紫微山有東峯磨劍池，敘述更爲疎漏，惟所載碧雲寺之建於唐大歷中，天開圖畫樓之起於宋天聖間，爲足補志乘所未及爾。

序

由吳門及海昌。中間數百里。原野平敞。而巍然隆起。乃有峽川兩山。獨高於橫。曠人墨客。遂借以遊憩。而山之勝。又足發其詠歌。蓋自唐白太傅。章評事。以來。迄于貝鮑。及今查范諸公。登臨覽觀之作。不一而足。邑乘僅列諸井里。而不詳其名蹟。不別有以紀之。則兩山之負奇特異于數百里間者。亦覺黯淡而無色。此志略之所爲作也。志創于沈君伯翰。蔣公丹厓訂定之。今其族孫擔斯更爲刪潤。嶺雲海月。點染筆墨。開而數千年之風雅節烈。尙與山川輝映。雖哀然兩峯。直可作匡廬。廬蕩觀矣。余嘗於秋霽登智標浮圖。望吾越中諸山。淡烟一抹。白鳥雙去。不禁穆然神往。率成短歌。蔣子近將纂輯古今題詠。續付剞劂。是不特有功于桑梓名賢。而羈縻過賓里謳巴曲。皆得廁名其末。抑何幸哉。雍正庚戌立秋日。於越陳梓書于靜愉齋。

自跋

宇宙間不乏佳山水。然或地處奧僻。高人逸士遊履之所未經。耳目之所未及。則其地不傳。卽或傳其地矣。更無人焉如史遷、柳州其人者。爲之蹈揚發越。於以贊天地之所逮。則山水之眞面目不出。故吾謂物情蕃變。理貫三才。倘人工未洽。則山水虽佳。終埋沒於荒烟蔓草中者。所在多有。吾峽當蘇杭孔道。爲名人跸履之所必至。自晉迄今。古蹟班班可考。或散見文集。或載諸邑乘。不一而足。要未有彙而爲志者。有之自峽石山水志略始。志略一書。係前輩沈伯翰所集。家伏光令丹崖所訂定者也。向鑄於留素堂外集。迄今棗梨殘缺。世人罕觀。今春杜門家居。搜簡陳篋。偶得是編。竊喜兩山有靈。藉以不泯。卽欲付之梓人。奈陵谷雖未變遷。而寺觀不無改易。因據原藁。聊爲增刪。是亦樂操土風之意。且令後之作者。得以考其興廢之由耳。敢云續志乎哉。雍正戊申夏五東湖蔣宏任跋。

峽石山水志

海昌 蔣宏任 詹斯

杭州府海寧縣治東北四十五里。爲峽石鎮。志曰：兩山夾水並峙，故名。鎮東曰審山，鎮西曰紫微山。審山，俗所稱東山也。高三十五丈，周七里半，爲海鹽轄。山多白雲，其土赤埴，石性多浮。杭郡志及寧邑舊志、廣輿記、諸書，謂漢辟陽侯審食其葬此，因名。海鹽志則謂上有宋臨海、南陽二郡太守沈景墓，故名。俗誤沈爲審也。禾郡志又謂鹽邑西六十里，逾長湖，曰沈山，上有宋臨海太守墓。又北曰峽石山，則沈山與峽，判然爲二矣。按地勢，沈墓應在贊山。今東山上有大塚，俗稱爲王墳，其爲辟陽墓，未可知。特無太守墓，自前代著作家，俱稱審山，未有稱沈山。峽，東山之宜從審，無疑矣。

審山，南岡嶺勢迴合，林木深窅，竹間大石，聳拔數丈，蒼黑峭潤，如巨靈偃立，猶然欲搏人。數小石亦離立，以助巔有古樹，根隨石罅，躑躅草際，狀如龍蛇，下視居民，棘樊桑戶，雞犬聲時與鳥語松風相間，幽可避世。昔人擬爲小桃源也。山趾有橋，俗呼景轉橋。橋下碧水潏洄，流入青松塘。東達海鹽縣，其間匯爲湖，瀦者非一區。雨時水氣挾烟而上，霏微如沐，遠望空濛。峽川十二景，此稱桃源着雨。

從橋下循山麓而北，當山之東溪，有烏夜村。晉何準寓居於此，一夕羣鳥環噪，乃生女，諱法倪，後選入宮。他日烏復夜啼，則穆帝立后之時也。因名其村至今。其地環湖背山，鬱然深秀，貝瓊記云：農圃四十家，屋

參差鱗比叢篠灌木交蔭其旁豈亦避世之人耶

由桃源拾級而上爲玉真道院宋仁宗景祐間建舊名翠雲亭明初建玉宸閣眞武殿殿前二石相掇古木盤踞其上路隅宛如巖闌可一丸封也名曰石關院西南嶺外近水處水漱山根土盡石出勢若東海之揚波起伏奔疊爲石瀾灘

度嶺而北爲御史吳遵墓吳遵字初泉嘉靖丁未進士授長樂縣後拜監察御史巡按西江其政績光于史冊焉西下山麓有許公祠康熙己亥年建許諱汝霖康熙壬戌成進士由翰苑歷官至禮部尙書予告歸里性不立崖岸里人樂其坦易塑像祀焉古者鄉先生歿而祭于社茲乃創於生時殆所謂殊時異世不相襲禮歟祠右百餘步有靈龜池邑志云大龜出曝卽雨唐肅宗乾元中於池上建靈龜寺宋眞宗祥符元年有過海頭陀榮法師改建崇福寺久廢惟池尙存循池而北舊有延聖妙智院建于宋徽宗政和二年至高宗紹興元年改妙智閣明萬歷四十年又改大悲閣供大慈像每歲二三月遠近士女獻香禮像卽藉以踏春遺鈿墜鳥時亦不免年少嬉逐若狂有識者不能無蘭茝之嫌

閣前西北隅爲北亞山審山之西阜也齊海鹽令周顒至此謂其林阜清疎亞鍾山之北境故名俗誤稱北野山其山庫不數仞無尺藁寸菁豈今昔殊勝與東望崇岡深麓間花宮玉局磴道浮屠高低層疊之勢橫列如屏惟晴空展步寓目纖悉風雨則失之矣故北亞晴嵐取景以此山麓細流若帶曰石魚涇通長水

涇上明嘉靖孝廉聞嘉言任亳州知州歸田後築別業居焉臨流負山與大悲閣相映時號小澗川又稱北山雲莊今廢照案海昌勝覽作聞人嘉言

由大悲閣南度小橋東上爲東山亭再上卽東嶽廟初於元至正間大清順治四年丁亥道士崔如琰復新之上增高閣飛輦際天康熙初年左建文昌閣右建張仙祠惜廢無存坡上爲三元殿久圯康熙六十年壬寅宗伯陳清恪公重建殿後有峻嶺嶺上爲蓬萊閣今圯殿右爲廣靈周侯祠嘉靖間顯神于此建廟祀之康熙九年于後坡建夫人殿殿後地甚平衍因名平山相傳吳越錢王曾習兵于此空曠爽塏足散人懷

稍東南舊有宋真定郡忠憲王後裔趙忬墓朱太僕禮云忠憲王建隆初翼戴藝祖由宿衛爲親軍南渡後其子孫賜第于峽今趙家匯其故址也王之女字宮梅善屬文未笄而卒祔王墓所芳魂不泯往時降乩自序其幽恨有惱殺夜來霜芙蓉已早傷又香消玉碎薜蘿村若箇臨風奠一尊之什今其後夷爲齊民且彫零垂盡墓亦遭發傷哉南爲磨劍石旁石潭一泓寒光清澈邑志云錢王曾淬劍於此至今鏽痕齒齒昔人因有劍石寒潭之咏北則洗眼泉眠牛石下有古墓橫互山腰窪穹如數間屋相傳辟陽侯墓正在於此雖無墓碑邱壘尙存聞昔有犯之者中出毒蟲螫之乃止夫宜聖衣冠猶遭顛倒茂陵玉盤尙出人間古來封蠶遇發邱郎將摸金校尉墮突者何限獨此墓相戒蟲螫果神物護之耶東爲三笑菴僧澹哉所啓也疏泉剔石結茆其上俯視阡陌縱橫浮沙出沒正同荷錢貼水而海面九十

有九峯環之。特標一勝。惜澹哉物化。而此菴亦浸廢矣。菴嶺爲闢雞石。貝瓊曰。兩石對峙。宛然老距當場。奈近爲童豎擊壞。不復爭季邱之雄矣。

自石畔北行三百餘步。有碧雲寺。唐代宗大歷三年。禪師法欽。賜號國一者。荆。舊名崇惠菴。元末燬於兵。明洪武二年。僧懷宗復建。萬歷間。始拓爲叢林。崇禎八年。更營闢於後。置貝葉若干卷。寺遠市廛。幽絕他處。於鐘殘漏靜時。蔭竹柏影。聽梵唄聲。驚葉發機。無不入妙。若夫碧雲夕照。蓋東山踞峽川之東。而碧雲又東山之東北隅。日逼下春。遙望西山。已在千重虛翠閒。而落照一規。更掛西山之西。反射明湖金波。潏泆。倏合倏開。正如佛氏所云海。若獻琛。但見珊瑚貝。鑾。璣鏡。夜光。雜寶錯陳。碧雲之景。必以夕照爲最云。寺左上。旁涌中陷者。爲鉢盂頂。泓然石罅者。爲天眼泉。隅削顛夷者。爲唐海鹽攝令劉長卿讀書臺。盤旋幽曲者。爲國一欽禪師展身洞。師苦山無水。喝石。石裂泉溢。穴不深丈。旱不竭。汲名喝石泉。後人嫌淺隘。鑿令深廣。而泉或時涸。靈泉非凡夫得增益也。聽雲軒臨泉上。境亦清冷。寺後最高處。烟蘿四合。巖草豐茸。其怪石嶽崎。有玲瓏。眠雲。諸石。及佛手。巖。冷雲窩。之勝。遊履鮮至。噫。武陵桃源。自漁翁。黃道真。後。能問津者何人。更有俱胝洞。唐俱胝禪師悟道處。可容二三人靜坐。足以消夏。寺南一峯特秀。似茵蔯。畫舒亭。亭翠微中。俗稱兜鑿峯。又稱將軍帽。不若字以蓮花峯爲雅也。峯左有逸士唐丹泉墓。諱俞。廉潔高隱。詩畫兼優。表具于墓。又明之鄭度。林逋也。

峯下舊有宋時韓墓肅衣亭。今廢。眈然冠碧雲上者。曰觀海峯。山之絕頂。極目東海。潮氣遙蒸。白光蓬勃。

有無間。髣髴張楷。裴優。各作大霧。較里數多少時。

上有智標塢。宋僧智標所建。按僧朱氏子。參賢首宗教。嘗住常州華嚴院。太守命祈雨。果日中祭龍。龍現。甘雨隨注。後以寒食日。集衆說偈而化。塢于審山。明嘉靖三十四年。遭倭變。雲楣綵桷。強半付之祝融。至萬歷四十三年。蜀僧瑞林重葺之。僧于塢下得何首烏。大如斗。食之。齒髮重新。壽百有六歲。順治間。塢傾頽甚。住持募修。功已垂成。爲雷震。明年又震。又明年。塢院復火。十年鳩工。廢于一旦。山靈豈有待也。康熙三十四年。黃灣南僧宏通感潮音而至。矢志復修。沈文若等力爲領袖。六年。功始告成。近日就傾圮。年不順成。欲修而未果也。塢踞高勝。登其巔。萬像眇小平。疇莽蕩汗漫。無極近望橫。爰諸山如青螺。頂浮湛野。烟遊氣中。遠者淡雲一抹而已。直下東北偏。雄崖斗絕。其色赤。寒泉淅瀝。惜無迅瀑。下瀉作真珠簾。若汲以淪茗。味絕勝。名赤壁。從色也。亦名半月。象形也。近者石砌壁傾。倘有好事。復舊蹟。幸甚。從泉所。攀蘿篠而下。有醉眠石。昔有一人醉臥數日。見者蹴起之。曰。予劉伯倫也。偶此醉眠。何堪爲須臾。失所在。石在邵氏墓旁。

又北折西上。爲走馬塘。周穆王時。諸侯徐偃王叛。逃會稽。潛匿于此。追兵夜及。有神馬數百。環山馳驟。護之得逸去。塘因名下望長水。舟行如鷗泛。幾欲俯身狎之。

塘之下。蒼松翠柏。臨水皆邱墓墳堂。而節婦祠尤特表焉。婦李氏。適里人吳仲嘉。少寡。苦志育孤。六十餘載。子天聲。敦孝行。力行善事。雍正五年。奉旨旌表。

塘之上。有孫公洞。康熙初年。主人孫宇標所鑿。因溪成潭。深丈餘。穿石爲門。廣四五尺。透迤深邃。入其中。恍然別一洞天。結屋當山之坳。自山外周圍視之。幾不知從入之徑。近爲審山名蹟。

出洞口而南。正當山之半。名半山。有東廣福禪院。宋神宗熙寧元年建。院塑白衣大士像。大士慈悲。現婦女身說法。愚民妄謂宜男。亦未見大士五十三相耳。

院後古梅數十樹。老幹橫斜。花時如雪。周琰構精舍其下。額曰飛雪軒。按琰字青羊。雅工畫吟咏。以蒲萄擅名。蜿蜒生動。尺寸有尋丈之勢。晚年著作甚富。如廣孝錄。疑夢編。唐詩選脈。至今膾炙人口焉。後俗子扳折。院僧甘尋斧柯。惜哉。

院以東。宋仁宗天聖年間。建天開圖畫樓。所見風帆沙鳥。烟雲竹樹。當不殊王元之記。竹樓也。恨廢于明宣德時。出院門。梯而下。梯盡。南尋得葛翁丹井。窈然而深。潏然而冽。中有五穴。通峽石湖。貝瓊記云。汲者往往得丹砂如霞片。或投石井中。輒有聲如雷。井上舊有葛仙祠。宋崇寧三年建。今廢。元延祐間。有無名氏題祠壁云。勾令仙踪曾此棲。石潭凝碧草痕齊。荒山遺廟無烟火。獨倚長松聽子規。出清江詩話。或曰。此卽葛洪顯跡也。井旁修竹萬竿。盡點湘斑。靜憩其中。疑擘九疑之雲。而帝子嫋嫋下也。竹西土墳起。廉隅方幅者。人稱顧况讀書臺。山勢環擁如窩。谿徑窈窕。林樾蒙密。葛蔓藤梢。復絡繹若帷幄。所謂書臺積翠之景也。逋翁更有別墅。歲久無存。止長松一本。離奇詰曲。老骨支天。豈逋翁所咏。門前有箇長松樹。夜半子規來上啼者是耶。近年亦厭棄人間。惟留委蛻。當是化作蒼龍。隨逋翁去矣。臺外西偏有石屋。北有

箬帽洞俱可棲隱。

紫微山高十八丈。周一里。其土黃壤。其石多火。唐長慶三年。中書舍人白居易刺杭州。秋八月。登此山。望峽石湖。中書爲紫微省。山以人傳。故名。舊有居易碑記。嘉靖中。關西孫太初徵山詩。有白傳斷碑樵斧礪之句。以知礪斧碑石猶在。而今不見矣。夫昔人得呂梁古碑文泐。可認者止三十六字。猶護如拱壁。視此不大可慨歟。

山南大剎。東晉武帝寧康間。尙書張延光捨宅所建。初名志愿。至唐肅宗乾元元年四月。敕支本縣稅錢修飭。唐末遭燬。宋太祖乾德二年甲子。營田將吳仁受捐資復建。成于太宗雍熙二年乙酉。距經始時已二十有二年。工亦艱矣。大中祥符二年己酉。賜額惠力寺。宋季又燬。重建于元順帝至正二年壬午。追明洪武二十四年。始拓爲叢林。嘉靖三十七年戊午。僧惠銘仍庀材鳩葺。隆慶庚午。工始竣。相去亦十有三年。本朝順治十八年。慧幢法師更新之。成于康熙八年己酉。不十載而輪奐巍然。視前此仁受惠銘爲獨速也。寺背山面水。門當一橋。卽邑志所載紫微橋。在縣東北六十里。下跨峽石市河者是也。元大德七年。建俗傳山後泉上小石橋者。誤。門外法幢二。東西掖門二。東曰歡喜地。西曰正法門。東掖之東爲韋駄堂。西掖之西爲總管堂。舊有遐觀樓。今廢無攷。中門三楹。內塑青葉髯樓至德二如來化身金剛。東西向。遊方者至。皆云法象偉壯。甲于天下。門旁兩雲鼓石。各鑄龍盤。石色潤如青玉。百餘年前。龍口忽出水。幾淹峽鎮里人。斷其口。始絕。彌勒佛座下大石一方。云是張尙書家搗衣石。石無奇。因尙書傳。尙猶陸魯望表。

鬱林石于門乎。由夾道而入。爲大雄寶殿。殿內古壁二。傳是公輸幻形所築。文理迴旋。莫得起止。異哉。以鬼爲之。亦勞神矣。貝清江記云。壁有畫龍二。一驤首洪濤中。一既飛而返顧。乃元順帝元統二年甲戌夏。葉茂章所作。漫滅不及見。殿後有大士殿。殿前左有鐘樓。鐘初艱于鑄。大士爲現村嫗。投金釵冶中。始成。至今釵痕閃爍可辨。聲聞二十餘里。舊有鼓樓。相向。今廢。鐘樓之東。昔爲飯僧堂。貝記云。有宋張卽之書。勝功德海額。又三賢祠。宋紹興末所建。祠祀晉捨宅尙書張延光。宋御史崔昇。迪功郎倪滂。皆有功茲刹。亦躋祀焉。三人並爲伽藍。堂祠廢後。其地竟爲寺僧茶毘之所。明天啓五年。寺僧梅溪卽其地。剏爲禪堂。前爲伏魔殿。東有張尙書井。今在深省山房。

禪堂稍東北。爲唐仙人馬湘宅。宋僧贊寧惠力寺記云。左及馬湘之宅是矣。宋大中祥符間。改宅祠湘。今已廢。作民居。按湘字自然。隨魏伯陽學道雲遊。後歸省兄。兄適出。湘謂嫂曰。特歸與兄分此宅。我惟愛東園。俟兄三日不歸。卒兄歸。感慟曰。弟學道有得。此歸示寂以絕我望。乃具棺殮葬之。東園是夕棺中晝然發聲。人咸驚異。時唐大中十年也。未幾。東川梓潼縣以馬道士上昇奏。敕發浙塚。驗之。止竹杖而已。至今小邱塋積。丹井依然。東園之名。終未泯也。時或風月清朗。自然羽衣玉杖。飄然而至。奇矣。邱北放生池。產異螺。無尾。陰雨能變五色。昔聖僧自西域來。取人家螺殼投池中。得復生。故又名祖師池。池上舊有祖師殿。殿廢。池亦不盈咫矣。

由東掖門上。爲關帝閣。嗣改魁星閣。架磴道上。今廢。閣後爲紫微泉。泉出石罅。澄泓莫測。宋孝宗淳熙時。

邑令鍾必萬甃爲大井。覆以亭。曰漱玉亭。今亭廢而泉亦竭矣。

循井迤北入小門。奇石特立者曰盤陀。高二三丈。周百圍。藉令植美箭。疏清泉。羅而置之堂廡間。何啻不作米家供。乃半入土牆。餘亦沉沒于蕭莽矣。蛛絲豕突。號爲穢區。茲石之遇固然耶。

泉之西。卽西廣福院。唐憲宗元和中。里人宋坦捨宅爲之。宋眞宗天禧間。僧辨親于仁宗朝召見。賜紫號慧悟禪師。神宗熙寧間。始賜額大聖寶殿。孝宗隆興中。更名泗洲殿。宋末燬。重建于元成宗大德□年。有宋李肩白碑記。趙子昂殿額。數年前爲鄉人踣裂。尙可聚摹。其內供桌。雕鏤工巧非常。傳是賈萬戶妝臺。賈黃岡里人。乃元末與明太祖共逐鹿者。殿鼓匡獨木剝成。石礎皆作覆蓮花形。有一礎韞玉。賈人識之。院東覽遠樓。貝瓊記曰。登樓望海。弱水三萬里。宛在其下。而蓬萊雲氣。隱隱接于闌楯。今廢無存。徒與天開圖畫樓同一慨爾。殿外東南隅。有鐘委地。青翠斑駁。古色照人。唐時物也。順治丙申。當事者檄縣取銅鑄大礮。胥吏請以上輸。今復作亭懸之。蒲牢如故。清響鳴霜。則邑令秦嘉系也。

再西爲周氏宗祠。康熙壬辰建。祀明季周宗彝。按宗彝字五重。崇正己卯。舉于鄉。及國變。戶科給事中熊汝霖以兵入海寧。宗彝亦起兵。峽石王師破峽石。宗彝死之。其弟岸生啓琦。格鬪于里巷。刃中腹。腸出納腸而戰。截其頸而仆。彝之妻卜氏聞變。遂攜幼子及二妾朱衣。紫衣。投青蘿池而死。次日。族人舉其屍。三人相抱。幼子而出。其面如生。一時全家侍婢及親族婦女來避。從死者四十八人。

由磴達山巔。乃五顯靈官殿。建于唐僖宗光啓中。至宋治平甲辰重建。葺于明宏治嘉靖間。廟中祈夢。

最靈。鶴湖孝廉陳增新將謁還，往求兆步。神示詩一聯云：憑將刺股懸梁志，散作河陽滿縣花。覽畢，瞥然而覺，莫解所謂。未幾授江西一令。蒞任才三日，神氣騷擾，匆匆作家報，闔戶自縊。家人急救得免。越數日，竟投繯死。豈此地有宿冤，數已前定，不可得避耶？其靈應如此。康熙二十五年，敕天下除五顯神，改爲崇正書院。內祀文武二神。其殿前石刻紫微山三大字。宋樊世卿書。又石刻唐章孝標詩，俱遒勁可傳。由磴道下，東過漱玉亭。翠微間林木延賞，人行萬綠中，不知有夏。東麓之勝，于此爲最。舊有翠微深隱亭，正面東山，林壑秀列，如披圖畫。今亭無存。又東下數武，卽萬竹山。山側石磴一百八級，名百步石。石盡處，得山浜，舊爲張尙書養拙園池館，廣百餘畝。故外水稱花園浜。遊人泛舟，由長水入浜，直躡山趾登岸，歲久填淤，其猶存者，如溝澮而已。

溪東橫隔一溪，東岸爲崇惠寺，卽北寺。大理卿朱逢吉碑記云：元武宗至大元年，西巖教公結茅于此，漸廣林舍，崇慧菴旣浸弛。明洪武十五年壬戌，復建法堂。越十年辛未，構大雄寶殿，敕將四果、圓覺、勝果三院并入，遂成叢林。其地逼山，故邑志載崇慧寺在于紫微山東麓也。

寺後爲塋影湖。凡塋影着水皆倒。此處獨直。正值沈氏祖墓前，墓旁古木一株，爲龍擾，剝存膚片，槁至天啓甲子，枝葉復生。越四年丁卯，裔孫沈端舉孝廉，俗以爲瑞，從墓所望山頭雲根亂插者，鶴亭仙洞在焉。山赭無林木，石勢縱橫，若臥若立，若擠若負，若拊若倚，若突怒而欲觸，若欹頽而欲墮，若奔猊，若蹲虎，種種異狀，正如柳柳州云：疏密偃仰，類智者所設施也。東北一石陡立，上復斜倚，巨石舒然，洞深丈餘，酷似

有人琢磨砥礪者曰紫微洞亦稱仙人洞馬自然煉丹于此羽化後白鶴飛還洞口徘徊旬日方去好奇者擬爲巖山遼陽故事立白鶴亭以表之址尙存洞旁大石矗起頂復平曠容數十人爲禮斗巖一名仙臺相傳馬自然丹成登眺處北下法華菴僧悟禪持法華甚精進寓于菴後厠土忽見如鱸鱖者數頭異之剛益力得泉一窪底皆石石有七竅泉從竅仰出輕清而甘昔唐高僧晏公于嵩山會善持誦法華龍爲出泉于寺左供汲今茲泉也悟禪何異晏公牧雲和尙來遊取法餘二非真之義名曰不二泉菴廢泉無恙也

東爲沈節婦潘氏墓氏早寡乏嗣苦節四十餘年卒天啓孝廉沈端捐資地以封樹邑令虞山時敏立石表墓翰林吳太冲作誌銘傳之與審山吳節婦墓東西對耀有光山靈合附紀焉

由西掖門入有高閣東向爲唐宋收藏三車之所其建置歲月未詳紹興六年丙辰寺僧迎佛牙供其上因名舍利閣載宋聞人符碑記理宗端平中廢元仁宗皇慶初興復改圓通閣俗以閣在大殿西偏稱西方殿閣前功德池池中鰓骨塼數十年間池漸小非復舊觀稍北行西折爲丹井樓井在樓陰汲注瓦甌以松火發之水味自別明胡虛白詩仙人葛稚川煉石紫微山孫子良詩借宿還登丹井樓若謝遷宋徽各有丹井樓詩則知葛洪丹井不獨在審山矣

井西爲放菴國初有墨浪師能詩善畫瀟灑不羈于此洗石誅茅作焦先蝸牛之廬地偏據勝老樹百餘章繞籬歷徑倚徙靜便墨公社外得查伊璜范文白家丹崖諸名宿品水談詩無曠日菴後遠眺南盡天

際。浮翠隱隱。非雲非氣。墨師謂是會稽諸山也。

北有西爽菴。僧無量建。西爽之南。有白水菴。菴中泉色白而甘。沈孝廉舉泉以名菴。有老梅二樹。蒼瘦扶疎。蔭滿廣庭。花時玉綴珠縈。清芬絕俗。宛然一幅楊補之得意筆墨也。石浪師作精舍。人與梅晤對。幾三十年。卒時命葬此。當是林逋後身。更從白水西望。有亭翼然。臨路隅者。爲西茶亭。白水僧每于暑月續趙州家風。以濟行人。

徽山南麓。按宋志舊有勝果寺。建於唐穆宗長慶間。俗稱南寺是也。明初并入崇慧寺。其址廢爲民田。橋之名今猶未更。順治丙申冬。住持超祖復建三元院。康熙□年。復火。僧朗月重新之。每遇神誕。士女雲集。近爲峽鎮名利也。

院東昔有淳朴園。正嘉間。隱士沈天用築。有涵虛閣。藕花灣。白鷗沙。柳塘。渡鶴缸。通樵徑。芙蓉溪。諸勝。按古杭雜志載。沈紫峽山人。構園時。非騷人墨客。不與之遊。庸人罕得窺其園者。一日。有小兒求見。自云橫山顧氏子。隨父出鎮。聞先生高誼。故來謁耳。公問客何能。曰。能詩。因指池中浮萍爲題。限場香梁等韻。卽口占云。雨打風飄無定場。幾回沾惹菱荷香。有朝團聚沙灘上。燕子啣來遶畫梁。占畢辭去。沈公愕然。明日遍訪。無有知其人者。人以爲顧逋翁之靈云。鄭尙書曉。謝詹事丕。文待詔徵明。倪翰林宗正。皆有詩載淳朴園集。惜遺蹟莫留。當是一園焚于萬曆也。

審山南下。爲東南湖。紫微山南下。爲西南湖。總匯爲南湖。卽白居易所登望者。或稱鵬湖。湖中一洲東南